

S'Isportellu de sa lingua sarda in su mesi de Idas serrat. Su saludu de sa responsabili de s'Isportellu.

In is ùrtimas diis de su mesi de Donniassantu at serrau s'Isportellu linguìsticu de su Comunu de Bàini. Est acabada s'annualidadi de finantziamentu 2008 chi fiat partida in su mesi de friaxu 2012 gràtzias, prus che totu, a sa Lei 15 de nadali de su 1999 n. 482 chi est cussa chi gaiat su dinai po aprontai is isportellus comunalis e dduus fàiri traballai. Impari a sa lei regionali 26 de su 1997, sa lei 482/99 at arreconnotu sa lingua sarda comenti a espressioni de s'identidadi culturali de sa Sardìnnia, donendiddi sa pròpiu dinnidadi de sa lingua italiana e fintzas circhendi de dda fàiri manìgiai in is logus istituzionalis comenti a Comunas, Provìntzias, Regioni e Iscolas .

Custu ufìtziu comunali, impari cun s'Ufìtziu linguìsticu provinciali e regionali, de candu est nàsciu e at incumentzau a traballai, at circau de contivigiari totu is fainas chi punnant a afortiai su manìgiu de sa lingua sarda in sa comunidadi linguìstica de Bàini e primu de totu:

- èssiri liòngiu intra de s'Amministratzioni comunali e s'Ufìtziu de sa lingua sarda de sa Provìncia de Aristanis;
- traballai a cuncòrdia cun s'Ufìtziu de sa lingua sarda de sa Provìncia de Aristanis e de Sa Regioni Sardìnnia po totu is fainas chi pertocant su manìgiu de sa lingua in ònnia cuntestu de sa vida pùblica e privada de sa comunidadi;
- aberri su Servìtziu de isportellu linguìsticu, chi tenit s'incuru de fàiri furriaduras, interpretariu, de gai informatzionis e de ispainai materiali a ufìtzius e citadinus;
- fàiri atividadis impari a bibliòtecas e àterus ufìtzius comunalis po arribai a torrai a bogai a pillu s'impreu in is mannus e is pipius, in is mammas, is babbus e is piciocheddus, de ligi, fueddai, iscriri sa lingua sarda in cali si siat chistioni.
- aprontai totu su materiali linguìsticu chi non si ndi podit fàiri de mancu po assegurai s'impreu de su sardu me in is trabballus de is ufìtzius, in su Contzillu comunali, me in is Assessoraus e me in is entis de foras;
- fàiri a manera, po mesu de s'aparìciu de cursus de agiornamentu, chi su personali de s'Enti e is àterus chi tenit interessu e gana potzat manigiai, in su fueddai e s'iscriri cosa sua, sa lingua sarda aintru de s'Enti etotu e me in is raportus cun su pùblicu.

Difatis est fintzas beru chi, mancai su sardu siat ispainau in totu sa Sardìnnia (francu in Gaddura, in Sàssari e me is biddas acanta, in s'Alighera e in Carluforti e Calaseta), nc'est s'arriscu siat chi s'ammesturit cun is àteras linguas (impoberendi sa calidadi linguìstica) o siat de èssiri lassau a una parti po arrexonis culturalis, sotzialis o econòmicas (arredusendisì su nùmeru de is fueddadoris).

Sa de sa lingua sarda, duncas, no est una chistioni linguìstica e sotziolinguìstica isceti, ma fintzas unu problema polìticu e culturali. Difatis, sa lingua est su princìpiu de s'unidadi e de s'identidadi de totu is sardus. Duncas, su de lassai isperdi sa lingua sarda, chi est su fundamentu de s'identidadi culturali de sa comunidadi de Sardìnnia, est oi unu perìgulu chi depeus circai de istesiai, cun su pistighìngiu de chini cumprendit ca seus arrischendi de perdi una parti manna de nosu etotu.

Po circai de arresolvi custus problemas nc'est abisòngiu de fàiri una polìtica linguìstica pretzisa e de importu mannu e duncas apariciai e sighiri unu progetu chi pertochit totu is

comunidadis e innui totus si ddoi potzant arreconosci: entis, comunus e, prus che totu, sa genti, is fueddadoris chi cussus entis rapresentant.

Custa est istada sa punna de su progetu "Lìngua sarda: lìngua de s'identidadi, lìngua de su mundu" chi su Comunu de Bàini impari a is comunus de Bobadri, Baressa, Ollasta, Pau, Abas e Sini ant bòfidu inghitzai prima a solus, imoi totus impari: fàiri educatzioni linguistica chi siat bella e chi lompat a totu is setoris de sa vida pùblica e privada de sa comunidadi.

Po cussu est pretzisu su de fàiri intrai sa lìngua sarda in cali si siat logu, incumentzendi de sa Pùblica Amministratzioni, ma fintzas in is famillias e cun is pipius. Po custu s'Isportellu at incumentzau, impari a s'Amministratzioni e a sa biblioteca comunali de Bàini, custu progetu "Imparatus gioghendi" e "Arrogus de arregordus de cultura bainesa", bessendi de is murus de sa Domu Comunali po si fàiri connosciri de totu sa genti de sa bidda, de is piciocheddus fintzas a is bècius e a is famillias. Sa punna est de fàiri a cumprendi a is babbus e a is mammas ca est de importu imparai a is piciocheddus sa lìngua nosta, poita est sa lìngua de s'identidadi e de cultura cosa nosta chi fait unu piciocheddu sardu differenti de unu de Olanda, Ispànnia, Milanu e Bologna. Ma fintzas poita pesai is fillus in italianu e sardu ddus podit agiudai a imparai s'inglesu e àteras linguas e a èssiri prus lestrus e iscadralutus fadendi test de lògica e matemàtica puru. Duncas custa lìngua sarda podit èssiri "una marcia in più", po is piciocheddus nostus, chi ddus podit agiudai e non certu istrobai. Ma po si dda imparai tocat a fàiri unu isfortzu totus impari: tocat a dda chistionai, chistionai, chistionai... Eus inghitzau ispassiendisì cun is atòbius in biblioteca de su progetu "Imparatus gioghendi" chi s'ant portau totus impari a andai a monti po "Sa circa de su tesoru" intra de Sa Pinneta de Bàini e s'Ennixeddu de Pau. Seus sighendi cun su calèndariu po is pipius chi s'Isportellu est aprontendi po Paschixedda e su iscriri is intervistas in sardu fatas a is bècius de Bàini po circai de non isperdi sa lìngua e s'istòria de sa bidda nosta, ma fintzas fadendi progetus po afestai sa Dii de sa Sardìnnia comenti si ispetat. Sa punna est de importu, ma non est una passillada. Certu ca passu passu...

Imoi s'Isportellu serrat po su mesi de Idas, ma a annu nou at a torrai a aberri e a sighiri su traballu cun s'agiudu de s'Amministratzioni e de totus is bainesus, mannu e pitius...


a si torrai a biri mellus!

Tatiana Frau

Nell'immagine sotto, il primo mese del calendario sardo, predisposto dallo sportello. Chi volesse il file, lo può richiedere al Comune.

GENNÀRGIU 2013
GENNÀRGIU SICU, MESSÀIU ARRIGU

Sa Fruta de s'ierre:



Su fueddu Gennàrgiu o Gennaxu ndi benit de su latinu IANUARIIUS e bolit nai "cunsacrau a su deus Ianus". Ianus fut su deus de lo gennas (Iànuas), duncas gennàrgiu est sa "genna de s'annu".

| luneddi | martis | mercaderis | giohis | ceràbura | sàbudu | domìngiu |
|---------|----------------|------------|--------|----------|--------|------------------------|
| 1 | 2 | 3 | 4 | 5 | 6 | |
| | Primu de cronu | | | | | Pasce de lo mes gennas |
| 7 | 8 | 9 | 10 | 11 | 12 | 13 |
| 14 | 15 | 16 | 17 | 18 | 19 | 20 |
| | | | | | | Santu Sebastiane |
| 21 | 22 | 23 | 24 | 25 | 26 | 27 |
| 28 | 29 | 30 | 31 | | | |

Comunu de Bàini
Uffizu de sa Lìngua Sarda